

DROGA... ZER DALA-TA?

Gaur dirala bederatzi edo hamar bat urte, gogoratzen naz zelan gure itzaldietan berba egiten genduan Euskadiko errieta-
ra droga etorteko zala bildurrari buruz, eta arazo onetzaz bear ziran neurriak artzen jakin bear genduala bere ondorio kaltegarri eta negargarriak ez gengiezan ezagutu.

Batzuk, lelokeriak esaten genduzala inoskuen; beste batzuk, ez giñala baikorrek... Ordurako, zoritxarrez, uri nagusietan droga sartuta egoan, gazte asko drogaren erpeetan arrapaturik, eta ka-teatze onen indarra euren gorputz-arimetan somatzen eben.

Toki guztietan lez, droga, astiro-astiro, baiña indar berezi bategaz, aurrerantz yoian bere bidea egiten. Egia esatekotan, giroa edo ambiente gertaurik egoan droga-bizitzarako; mariñelen errikoak esango geunken lez «masixe» botata egoan eta laster agertuko zan agertu bear zana.

Batzuk, gauza barri bat lez agertzen zalako, gaurkotasunez jantzirik... artuaren-artuz bere menpean gelditzen ziran; beste batzuk, mundu onek emoten eutsoen eguneroko bizitza asper-garriztat eukeelako eta drogaren esperientzi barriak lilluraturik...; beste gazte asko, euren barruko eztabaidak ondo konpondu aal izatea gatxa be gatxa ikusten ebelako eta drogak eragiñez «beste neu bat» ausartagoa, izlariagoa, alaitsuagoa barrizatzen ebelako...; oneik eta areik, giza-legeen loturetatik askatasunez bizi nairik...; eta ainbat eta ainbat, uste izanez aiñ kaltegarria ezalakoan izan-

go...

Gaur danok dakigu geure errietan gertatu dana eta, zoritarrez, ondiñokan gertatzen dana.

Non dagoz, geure iritziz, egoera larri onen iturburuak?

Leenengo ta beiñ esan bear doguna auxe da: mundu guztia kezkaturik daukan arazo bat dala, eta munduak ezagutu dituan aldakuntzetara jo bearrean gagozala zeozer ulertu nai badogu, beintzat.

Goazen, bada, arira. Luzeegi ez egitearren geure lantxo au, puntu bat ikutuko dogu bakarrik.

Aspertuta gagoz esaten eta entzuten, baiña sustrairik garrantzitsuenetariko bat auxe dogu: KONTSUMOKO gizarte bat osotzen dogula; au da, EZ GARALA IZATEKO BIZI.. EUKITEKO BAIÑO. Eta ondo dakigu eukiteak ez dauala sekula egarririk kentzen ezta iñoren biotzik asetzen bere. Eta bizitza onela ulertzen badogu... gure elburua argi dago: jan, edan eta amaibako atsedenezko jai egin daigun biar ilko gara-ta.

Onela bizi izateak -jan, edan eta atsegiñ guztien billa ibilteak- garrantzi aundiko ondorio bi dakarguz:

1.- Edozeiñ, baiña batez be gaztea, zenbat eta egarri biziagoaz ibilli EUKItearen bide-utseetatik zear, ainbat eta ariñago asiko da aspertzen, naskatzen eta gauzen izatea, neurria eta balioa galtzen. Auxe da, aiñ zuzen be, neurribako ugaritasunaren emaitza edo frutua: ezerezeri garrantzirik ez emotea... eta beiñ eta barriro gauza-barri-pozgarri baten ames-utsean egotea. Ona emen zabalduta droga-bidea.

Bigarren ondorioari eldu baiño leen, azalpentxo bat nai dautsat egin oraintxe bertan esan dodanari. EUKITE ori ez da gauzak eukiteari dagokion zerbait bakarrik, ez; EUKITE orretan sartzen dira, gazteak izanik, nagusien jokabideak, artu-emonak eta bizimodua eureganatzea; neurribako askatasun baten ibiltea; lau gauza dakiezelako Matematikasetan, Fisikan edo Elektroni-

kan, gurasoen gainetik dirala uste-izatea; gaurkotasunez jantzita datorren edozer onartzea eta beste batzuk atzokoak diralako baztertzea eta abar. Auxe da, zoritxarrez, bizi dogun egoera latza eta garratza. Eta argi dago: zenbat eta gorago igo egizko sustrai barik... ainbat eta beerago jausiko da bunbada egiterakoan.

2.- EUKI-UTSAren bigarren ondorioa auxe da Bizitza, zentzunbako ikuspegi baten frutu lez onartzea.

Ez badago GOIKO-JAUN bat, nor izan daiteke emen beian jauna? Nork dauka egia? Zer da egia? Zer da gizona? Zer da historia edo kondaira? Non dira gureak izan ziranak? Non egongo gara geureak diranakaz? Batzuk beti ondo eta beste batzuk beti txarto? Zer dala-ta sufritu? Zer dala-ta bizi? Onelako galderak geuk uste baiño geiagotan dabiltz drogazaleen ago eta biotzetan. Drogazale guztiak ez dira lasaitasunaren eta alperkeriaren seme-alabak, ez.

Ba dagoz, uste dabenak, galdera oneei emion bear jakezan erantzunak liburuetan ikasi bear dirala diñoenak; bai, orretan egi zati txiki bat ba dago; baiña, batez be, galdera orreik beste bi-deetatik artu bear dabe euren erantzun egokia: *egizko artu-emon maitetsuetatik ETA NORBERE IZATEAREN ALDE LAN EGITETIK*. Onela, burua ta biotza alkaturik, poztasuna eta bi-zitzaren zentzuna datoz bereala eta batera. Ementxe datza gure kakuaren ardatza. Bai... zelakoak dira gure artu-emonak? Zerreri emoten dautsagu garrantzia gure munduan? Zeintzuk dira, per-sona lez, gure elburuak? Famili lez? Erri lez? Batzuk diñoena egin bear ko ote da?: dana usteldurik dagon ezker... dana apurtu eta mundu barri bat sortu?

Amaitu daigun geure lantxo au azken-iritzi egoki eta itxaropentsu bat jarririk.

Argi ta garbi dagoz drogasaltzailleen gurariak: leenengoa, dirua, dirua ta dirua. Eta bigarrena, pixka bat ezkutuan dago; baiña ba dakigu zein dan: mundu au aldatuko leukeen iraultzai-lleak lotan euki, amesetan, mundutik aparte, faltsokerizko atse-denez beterik... gauzak bere betiko tokian jarraitu dagien.

Esnatu gaitезan, bada, borondate oneko gazte eta nagusiok!

Zubi itxaropentsu bat egin daigun, gagozan ibaiaren ertze-
tik beste ertzeraino eltzeko: *Eukitea IZANaren menpean egon dai-
ten*; bizitza, burruka jator bat lez ulertu dagigun; nagusien espe-
rientzi garbiak eta jatorrak gazteen kritika egokiagoagaz eta
maitetsuagoagaz bat egin... jokabide eta urtenbide barriak asmatu
ta urratu daiguzan gazteen Euskadi barri ta garbi bat sortzen aa-
leginduz.

Gaurkoz besterik ez. Agur bero bategaz agurtzen zaituet.

Kepa Agirre



**ESTUDIO
FOTOGRAFICO**

ARGALKARI

*Ezkontzak - Argazki gaiak saldu - Argazki-aldaketak
Lauki-ertz ipinketa - VIDEO - Plastifikatzeak
Fotokopiak (Txikitzeak)*

San Miguel kalean, 14. Trañabarren-Bloque, 1-4-13
Urrut: 673 0509 **Matiena - Abadiano**

AMOREBIETA